

viva la justizia fra le persone del mondo, l'ha redità del regno de Mori e de azemini e de turchi, Alexandro del tempo de ogni grazia, et patron de la parola del credito, dà loco e ogni pergolo cheriega e letiera e corona, donativo de ogni locho del mondo e pol donar ogni paexe in ogni locho, punitivo de rebeli e de idolatri e de quelli che à torto, mantien la justizia e quelli che vien tortixadi contra tuti, punitivo de quelli ch'è fora de raxon, servidor de tuti doi loghi santi, Re de tutti do i loghi, umbra de Dio in terra, mantien la regola del so profeta e governo, Signor de tutta la terra, segurador de tutto el circuito e terra del mondo, el pì glorioso Signor del tempo, spandando la justizia e gratia, Signor de Mori, de Re, de Soldani partizipal, el Signor, el ealife Campson El Gauri, Dio mantegna el so regno, el so soldanado, e dia vitoria al so exercito, el so poder sora tutte creature e tutto el paexe, e la so bontà e la so gratia e la so justizia. A la presentia del Principe honorado et sapientissimo, valentissimo, potentissimo, honesto, lion, gloria de la fede di Cristo, belezza de la fede de la Croxe, doxe de Veniexia, apostolico del batesmo, fidel de li re e del Soldan, Dio mantegna la so Illustrissima Signoria, patron di Veniexia. Mando salute grandissimamente. Con longo tempo daremo aviso del nostro cuor purgado, che semo per satisfar. E daremo aviso, le vostre do letere è vegnude a la nostra Porta santa. Una de le quale che ha dito la presentia dil Doxe del fato di merchadanti venetiani, e de la seusa per che causa non vien con le galie per el dolor che avè in la terra di Alexandria, che l'ha mandà a chiamar marchadanti per comprar canevaze, che loro non giera de bona volontà. La presentia del Principe à confortadi, e ch'el Doxe li à mandà a confortarli, e dito: « No xe consentimento del Signor Soldan. » Nostro consentimento santo, che nui non semo contenti, nome del dover, ché la Signoria de Veniexia ha comandà che li marchadanti vegna con le galie. Quando el Principe de Veniexia ha saputo che le canevaze è per el signor Soldan, ha comandà che le sia portade secondo come à dito quel che ha dimandà a la presentia dil Doxe che sia fato; i so merchadanti honoradi apreziadi saranno più, che certo la nostra presentia santa, el nostro comandamento santo, è insido per recomandar la nazione veniziana, honorarli e tratarli con la bontà e bona justizia, per lo bon amor e carità che xe fra nu. De quel che se ha ditto del tributo che coloro di Cypro sarà col Doxe contra so' nemici, e lori ha tornato con solitudine di mandar i tributi, quel che se dà aviso a la presentia sapientissima de la nostra Signoria

santa, è acetà sta seusa de loro, spazà quel che i ha a far; non ha piu seusa de mandar, del tributo che fo acordado per avanti con l'ambasador del Doxe, quando l'era in la nostra Porta santa; subito zonto a Veniexia, che manda quel che resta a dar per el tempo passà e per li anni presenti, che non ho visto opera alcuna. L'è passà uno anno oltra quello che se die dar, che la presentia del Principe manda a sollicitar e strenzer e comandar de mandar el resto che se deve dar, e anche li do anni che manca portar quel che die dar secondo il consueto; se non fosse la benivolentia fra el Doxe, non n'aspeteressimo tanto. Quel che xe dito a la presentia del Doxe in la segunda letera cercha el fato del pano, de quel che xe intravignù, daremo aviso, che sia sempre l'acordo fra la nostra doana santa e l'ambasador in presentia di marchadanti prinzipali de la nazione vostra. Che se manda le galie ogni anno con arzenti, merze per ducati 600 milia; che non è stà niente. È passà do anni che non xe vegnude galie, quando xe vignudo per ducati 50 milia al pi' che sia, e comenzà far contrabando arzento e altro, e la doana compra a l'arzento per el dachiari del Signor Soldan, e paga la valuta, e mo' non mostra niente ogni cosa che i pò far; contrabando i fa, e la mia Signoria santa intènde ogni cosa, e non cerco niente nè non dago rechie per amor del Doxe, per continuar le cautele. Ha fatto contrabando di panni ditti e mesi un navilio su l'altro. Se non fosse la benivolentia del Doxe con nui, e i cuori chiari bianchi, haveria castigà cui ha fatto stà cosa. Ho dolor de la lamentation di marchadanti veniziani che la mia presentia santa non vol mal de nissun; i marchadanti venetiani in nostro paese, in nostro regno sono honoradi, apreziadi. S'el Principe ha inteso cosa contra alcun, ch'el manda dar aviso chi xe culù che fa mal, che li puniremo secondo el suo merito: e la presentia del Doxe conforta i so' merchadanti che manda le galie compide, carge con le so marchadantie secondo l'acordo con l'ambasador, e ch'el comanda ai marchadanti che vada per la via drete, che non veda i fondamenti, che non faza i contrabandi, nè altro, che sarà honoradi, apreziadi e segurissimi. E nui comandemo che si faza la eria per i marchadanti venetiani, che sia honoradi, apreziadi, securi, e che venda e compra e togia e daga. E darà aviso in le cose: con questo ch'el solizita el tributo che si mandi più presto si pò, perchè quello non bisogna tardar più. E torneme la risposta santa a la presentia del Doxe, che darà aviso. El Signor Domene Dio meterà bon governo e che dà gloria al suo riposo e a la so grazia, piacendo a Dio. 28 luna